

Lass' der fei bloß  
kann Bärn nedd naufbindn

Der Autor ist seit Beginn seines Lehrstudiums 1971 ein bekennender Wahlnürnberger, der (besonders) die fränkische Sprache, sowie die baulichen, kulturellen und – nicht zuletzt – kulinarischen Spezialitäten Frankens „gans arch mooch“, und der vor langem – quasi automatisch – auch Fan des ruhmreichen heimischen Fußballvereins, des „Glubb“ wurde, mit dem er gern jubelt, häufig(er) aber auch leiden muss.

Vom selben Autor sind im Engelsdorfer Verlag bereits erschienen:

**„Was mahndsnerl no du doderdsu?“** – Ungereimtes, quer durchs Hirn geschossen“ ISBN 978-3-95744-731-9.

**„Des mussder amohl illusdriert vuurschdeln“** – Ungereimtes, quer durchs Hirn geschossen, Teil 2

ISBN-13: 978-3-96008-378-8

**„Wass der Geier, ob des schdimmd“** – Ungereimtes, quer durchs Hirn geschossen, Teil 3

ISBN 978-3-96008-864-6

Titelfoto: B. Hübel, 2018:

Der Autor beim Besuch eines Kunstprojekts in Neuf-Brisach, Frankreich

**Der Autor möchte natürlich wiederum seiner Frau für ihre Beratung samt der mühsamen Durchsicht der Texte, sowie für das Titel-Foto herzlich danken.**

Diese Leseprobe ist urheberrechtlich geschützt!

**Erich Hübel**

**Lass' der fei bloß  
kann Bärn nedd  
naufbindn!**

**Ungereimtes, quer durchs  
Hirn geschossen  
Teil 4**

Bibliografische Information durch die  
Deutsche Nationalbibliothek:  
Die Deutsche Nationalbibliothek verzeichnet  
diese Publikation in der Deutschen  
Nationalbibliografie; detaillierte  
bibliografische Daten sind im Internet über  
<http://dnb.dnb.de> abrufbar.

ISBN 978-3-96145-471-6

Copyright (2019) Engelsdorfer Verlag Leipzig  
Alle Rechte beim Autor  
Hergestellt in Leipzig, Germany (EU)  
[www.engelsdorfer-verlag.de](http://www.engelsdorfer-verlag.de)

10,00 Euro (D)

Diese Leseprobe ist urheberrechtlich geschützt!

## **Abendland - subjektiv**

Es kann si ja goor kanner vuurschdeln,  
wey froh i bin,  
dass i im Ohmdland  
aff die Weld kommer bin  
und nedd im Morgnland!  
Dord kämerd i beschdimmd  
goor nedd dsurechd.  
Wall i bin doch suh a Morgnmuffl.  
In der Frey muss i lang ausschloofn,  
bevuur' sd midd mier  
wos onfanger konnsd.  
Obber am Ohmd,  
do laaf i dsur Hegsdform aff!

*Februar 2018*

## Alternativen

Mer hodd amohl widder  
rumgfroochd und fesdgschdelld,  
dass mier Frangn  
und bragdisch die massdn Deudschn  
midd unserm Lehm und die Umschdänd  
eichendlich rechd dsufriedn sinn.  
Uns Deudschn gfälld unser Land  
dsiemli guhd, suh wey' s is,  
und desderweng brauch' mer wergli  
kanne Aldernadive fier Deutschland.

*November 2017*

## **Alterserkenntnis 1**

In meim hohn Alder  
hobb i ahns sicher glernd:  
Geld machd gans gwiess  
nedd glügglich,  
suh lang' s am nedd gherd!

*Mai 2018*

## Alterskenntnis 2

Wemmer genau hieschaud,  
mergd mer' s immer widder:  
Hinder am erfolgreichen Moo  
schdehd eichendlich immer  
a kluge Fraa.  
Hinder anner erfolgreichn Fraa  
schdehd derfier massdns a Moo,  
der bloß no bedebberd schdaund!

*Mai 2018*



## **Angeber/in**

Do hodd doch neili im Fernseh  
suh a Ongeberin gsochd:  
„Iech hobb mier gesdern fei  
mein allererschdn Borno ongschaud.-  
Allmächd, wor i domols no jung!“

*April 2017*

## Arztbesuche

Es is fei a rechde Bloocherei  
midd' n Älderwern,  
wall mer hald ah  
ondauernd ircherd ann Dogder brauchd.  
Und do kammer scho  
manchmohl echd  
durchanander kommer.  
Iech hobb mi neili  
aff ann Dermin  
bein Dogder vuurbereid'  
und wor grood am Gehn,  
do sochd mei Fraa,  
iech sollerd dem Ordobäd'n  
schenne Grüß ausrichdn.  
Und iech Doldi hobb mer  
egsdra gründlich  
die Dsähn budsd ghabd -  
obber der Dermin wor onscheinds  
nedd bein Dsohnardsd.

*Juni 2018*

## Der achte Aufstieg

Mier hamm' s fei wergli gschaffd:  
Unser Glubb is aufgschdiegn,  
edsd scho dsum achdn Mohl  
in die erschde Bundesliga!  
Allmächd, is des schee!  
Des is a Gefühl,  
wo Weihnachdn  
echd a Dreeg dergeng is.  
Suh a Gefühl mecherd mer  
goor nimmer missn müssn.  
Aufschdeign is es allergressde!  
Und beim Glubb is doch ahns gwiess:  
Midd dem wern mer beschdimmd  
immer widder die Schangs  
aff des subbergeile  
Aufschdeicherggefühl grieng.

*Mai 2018*

*Beim Erscheinen dieses Buchs ist der „Glubb“ ja  
(leider) wieder auf dem besten Weg, die nächste  
Aufstiegsmöglichkeit einzuleiten.*

## **Weltweite Auswirkung**

In mein dswodn Buch  
hobb i gschriem,  
dass i mier guhd  
vuurschdeln kennerd,  
dass mer widder Delefonheisler  
eiführn mecherd.  
Gesdern her i im Radio,  
dass mer genau des  
in Werdshaiser und  
in suh Großraumbüros  
in die USA edsd vuurhodd.  
Iech hädd fei wergli nedd dachd,  
dass meine Degrde  
suh a weldweide Auswirkung hamm.

*April 2018*

## **Außenwirkung**

Gesdern hobb i  
midd ann Moo blauderd  
und doderbei erwähnd,  
wey ald i bin.  
Do hodd er gsochd,  
dass er des nedd dengd hädd,  
und i vill jünger ausschauerd.  
Suh wos herd mer ja scho gern,  
obber ehrlich:  
No lieber däd i fei  
echd urald ausschauer,  
obber dervier no jünger sei.

*Juli 2018*

## Deutsche Befindlichkeit

Des is edsd fei gscheid bleyd –  
iech glaab, i bin middlerweiln  
scho goor ka echder Deutscher mehr.  
Echde Deutsche fühl'n si nämli  
onscheinds nedd wohl,  
wenn's nedd dauernd  
ircherds a Angsd hamm.  
Mier obber gfälld mei Rendnerdosein,  
iech komm' normohlerweis  
guh'd midd meiner Fraa aus,  
i schdreid mi fasd nedd  
midd die Nachbern,  
mei Geld langd mer eichendlich,  
der Dogder sohd,  
dass i ald wern kann.  
Mier gehd's suh richdich guhd -  
iech wass scho goor nimmer,  
wecher wos i edsd  
Angsd hamm kennerd,  
wey die „echdn“ Deudschn.

*Mai 2018*

Diese Leseprobe ist urheberrechtlich geschützt!

## **Fortschritte im Bildungswesen**

Mehr wey fuchdsg Johr  
konn i edsd scho  
es Bildungswesen in Bayern beobachdn.  
Es hodd immer widder  
aweng wos Neis gehm,  
obber echd besser is' nie worn.  
Der Schulbädagogigbprofessor hodd  
domohls scho dodahl rechd ghabbd,  
wey er gsochd hodd:  
In der Bildung bei uns  
is' wey in ann Hühnerschdall am Ohmd –  
die Henner hoggn schee ruhich  
aff ihrn Schdängla,  
jedn Dooch aff' n gleichn.  
Wenn dann anner vo außn  
gecher die Dür haud,  
gibd' s drinner a Mords Gschraa,  
alle renner wild durchanander,  
vill Federn flieng durch die Gechnd.  
Obber nooch anner Weil  
hoggn si alle widder genau  
aff ihr alds Schdängla,  
und dann is widder alles  
wey' s scho immer wor.

*August 2018*

## **Brexit**

Wenn die Bollidigger in England  
wecher dem Brexit suh weider machn,  
werd wohrscheinds bald  
die Gwien Elizabeth  
a Fernsehonschbrooch haldn  
und soong:  
„Hiermidd ergläre iech feierlich  
die Hälfd vo meim Volg  
und es ganse Underhaus  
fier dodahl Balla-Balla!“

*Januar 2019*



## Datenschutz 1

Mier lehm in anner Dseid,  
wo die ann Naggdfohdos  
vo sich ins Indernehd schdelln,  
und die andern aff kann Fall  
in ann Delefonbuch schdeh wolln.  
Iech hobb gherd, dass' suhgoor Leid gibd,  
die in ann Lodn nimmer midd ihrn Nomer  
ongredd wern wolln,  
damidd niemand hern kann,  
wer sie sinn!

In Leipzig, an der Kasse  
vo denne ihrn Diergardn werd mer  
– wecher der Besucher-Schdadisdig –  
gfroochd,  
wos sei Bosdleiddsohl is.  
Der Moo vuur mir wollt des nedd soong,  
wall' s ja Leid wey iech – hodd er gmahnd –  
hädhn hern kenner.  
Und des wollt' er nedd.  
Wall iech hädhd ja sunsd soford  
sei Wohnung in 06618 ausgraamd,  
odder sei Geld vo der Bang  
in 06442 abghobn.  
Und desderweng derf mer niemand  
sei Bosdleiddsohl verrodn!

*November 2018*

*06618: Naumburg/Saale, Sachsen-Anhalt*

*06442: Nebra, Sachsen-Anhalt*

Diese Leseprobe ist urheberrechtlich geschützt!

## Datenschutz 2

A neie Idee dsum Dadnschuds  
hamm' s edsd in Ösderreich ghabbd.  
Do mahner' s, dass' in ann Miedshaus  
kanne Noomer neber' n Glinglgnobf  
mehr gehm derf.  
Wenn do dann a Bosdlerer  
ann Brief eiwerfn muss,  
wo ka Wohnungsnummer draffschdehd,  
der grichd ja beschdimmd soford  
a „Post-traumatische Belastungsstörung“!

*November 2018*

## Deutschland im Herbst 2017

Edsd hammer ann neier  
Bundesdooch gwähld.  
Die SPD hodd gscheid verluurn.  
Do wor des Bräsidium dodahl beleidichd  
und hodd gsochd,  
dass nimmer middregiern wolln.  
Die CDU und die CSU hamm bragdisch  
genau suh vill verluurn.  
Die Merkel hodd si hiegschdelld  
und gsochd, dass' goor nedd wass,  
wos sie andersch machen sollerd.  
Und die is edsd scho  
dsum virddn Mohl unser Kanzlerin.

Mer sochd offd und gern,  
Deuschland wär des Land  
vo die Dichder und Denger!  
Iech deng do eher,  
vill vo die Deuschn  
sinn offd hald nimmer  
gans dichd.

*Oktober 2017*

## Dialektsprecher

Edsd muss i meim  
Minisderbräsidendn Söder  
doch ah amohl rechd gehm  
- und des mach' i nedd ofd  
und beschdimmd nedd gern –  
obber er hodd gsochd,  
- und des hamm' s suhgoor  
im Fernsehn brachd –  
dass es Redn im Dialeggd  
indelligender machd.  
Des sichd mer doch  
scho allans an mier!  
Und iech schreib suhgoor  
no aff Frängisch!  
Bloß wern' s hald immer wenicher,  
die gans echdn Nermbercher.  
Freyer hodd' s ja vill Leid gehm,  
die hamm a Durchsooch  
in ann Bus odder anner Schdrasserboh  
goor nedd vershdandn  
wey „Ziegelstein“, „Zerzabelshof“  
oder „Kohlenhof“,  
wall' s bloß „Dsiegerlerschdaa“,  
„Dsabbo“ odder „Kullnhuuf“  
kennd hamm.  
Obber wenn edsd der Minisderpräsident  
den Dialeggd dsur Scheffsach' machd -  
villeichd werd' s dann ja widder!

*Oktober 2018*

Diese Leseprobe ist urheberrechtlich geschützt!